

四庫全書

集部

欽定四庫全書

江湖小集卷七十八

宋 陳起 編

戴復古石屏續集

客行河水東

客行河水東客行河水西客行河水南客行河水北行
行無已時朱顏變老色至人棲一方庭戶羅八極保心
如止水不受萬物役有道肥其軀故能適所息

鳳鳴有吉凶

鵲噪令人喜，鴉噪令人憎。人心自分別，吉凶屬禽聲。舜時有鳳鳴，文王時亦鳴。漢時鳳亦鳴，六朝時亦鳴。鳳鳴有吉凶，人不仔細聽。

江南新體

郎船江下泊，妾家樓上住。朝朝暮暮間，上下兩相顧。相顧不相親，風波愁殺人。

感寓四首

采薇人固高，飲露蟬遂清。謀茲一粒粟，舉世共營營。

營亦多途中有虧與盈陋巷一簞食朱門九鼎烹窮達
各有命緊誰主權衡吾生未可必秋風白髮生

蛛網罩虛簷一飽羅羣飛寒蠶齧枯桑一身終繭絲物
物巧生理我生拙奚為貂裘日已敝石田歲長饑一貧
已到骨一氣儻未衰舉目送飛鴻悠悠知我誰

夜雨扶西風撼撼庭樹浮生堪幾秋青鬢忽已素鉛
刀剗九牛策蹇望長路所操莽無竒自好徒自誤改絃
調新聲履道易故步收功在桑榆其敢怨遲暮

紅紫委路塵綠樹有嘉色
剗心晚聞道玩物若有得
青春坐銷歇方茲見真實
人生到中年胡不保明德
秋風墮庭枯棲鳳去無迹
矯首碧雲端一語三歎息

頻酌淮河水

有客游濠梁頻酌淮河水
東南水多鹹不如此水美
春風吹綠沙鬱鬱中原氣
莫向北岸汲中有英雄淚

刈麥行

腰鎌上隴刈黃雲東家西家麥滿門
前村寡婦拾滯穗

餽粥有餘炊餅餌我聞淮南麥最多麥田今歲屯干戈
飽飯不知征戰苦生長此方真樂土

元宵雨

窮人不謀歡元夜如常時晴雨均寂寞蚤與一睡期朱
門架燈火歌舞臨酒池酒闌歡不足九街恣遊嬉前呵
驚市人簫鼓逐後隨片雲頭上黑翻得失意歸

鄂渚張唐卿周嘉仲送別

武昌江頭人送別楊柳秋來不堪折漢陽門外望南樓

昨日不知今日愁英雄握手新相識人情政好成南北
酒闌人散最關情一鴈西飛楚天碧

詰燕

去年汝來巢我屋梁間汗泥高一尺啄腥拋穢不汝厭
生長羣雛我護惜家貧惠愛不及人自謂於汝獨有力
不望汝如靈蛇銜寶珠雀獻金環來報德春風期汝一
相顧對語茅簷慰岑寂如何今年來於我絕蹤跡一貧
簾幙畫堂間便視吾廬為棄物

寄趙鼎臣

學如劉子政不使校書天祿閣文如李太白不使待詔
金鑾殿倚樓終日看廬山贏得虛名聞九縣才忌太高
心忌太清平平穩穩為公為卿騏驎可羈乃歸帝閑鳳
麟莫馴為瑞人間人間為瑞徒能好騏驎可羈終遠到
歲寒心事幾人知手把梅花供一笑

阿竒晬日

窮居少生涯養子如種穀寸苗方在手想像秋禾熟吾

兒天所惠骨相頗豐碩娟娟懷抱平一歲至周日願汝
無災害長大庶可必十歲聰明開二十早奮發胸蟠三
萬卷手握五色筆策勲文字場致君以儒術不然學孫
吳縱橫萬人敵為國取中原闢地玄溟北他年汝成就
料我頭已白光華照老眼甘旨不可缺為子必純孝為
人必正直以我期望心一日必一祝勿謂癡小兒茫然
無所識胎教尚有聞斯言豈無益

松江舟中

四首荷葉浦時有
不測末句故及之

夜聽楓橋鐘曉汲松江水客行信忽忽少住亦可喜且
食鱸魚肥莫問鱸魚美

垂虹五百步太湖三萬頃却除岳陽樓天下無此景范
蠡扶西施功名付烟艇

秋風吹客衣歸興浩難寫寒林噪晚鴉紅日墮平野簫
師解人意櫂棹酒旗下

扁舟乃官差舟子吾語汝汝為我作勞吾亦不汝負好
向上塘行莫過荷葉浦

漁父詞 二首

漁父飲不須錢柳枝斜貫錦鱗鮮
換酒却歸船

漁父醉釣竿閒柳下呼兒牢繫船
高眠風月天

觀陸士龍作顧彥先婦答夫二首有感次韻

北風吹歲暮空閨獨棲止
夙興淚盈掬夕息夢千里
妾生胡不辰失身從蕩子
嚼蘖苦我心餐冰噤我齒
離異何足愁險澁可勝紀
寄書西飛雁反復話終始

鼠璞竊美名冠玉假外觀
良人誇意氣下妾愁歲晏念

君始行邁雪嶺梅初祭春風桃已紅光陰等飛彈相思
果如何金環寬玉腕昔為連理枝今作搏沙散惜哉牛
與女脉脉阻河漢特棲良獨難守堅祇自諧雙劍幾時
合寄聲問華煥勿聽五羊歌富貴忘貧賤

栗齋輦仲至以元結文集為贈

尋常被酒時歸到意投枕為愛次山文今夜醉忘寢偉
哉浯溪碑千載氣凜凜春陵賊退篇少陵猶歛衽文章
自一家其意則古甚太羹遺五味純素薄文錦誓牙不

同俗斯人異所稟君君望堯舜人人欲倉廩古道不可
行時對窳尊飲

杜甫祠

嗚呼杜少陵醉卧春江漲文章萬丈光不隨枯骨葬平
生稷契心致君堯舜上時兮弗我與屹然抱微尚干戈
奔走蹤道路饑寒狀草中辨君臣筆端誅將相高吟比
興體力救風雅喪咏史數十篇才氣一何壯到今五百
年如公尚無恙麒麟守高阡貂蟬入畫像一死不幾時

聲迹兩塵莽何如耒陽江頭三尺荒草墳名如日月光
天壤

琵琶亭

潯陽江頭秋月明黃蘆葉底秋風聲銀龍行酒送歸客
丈夫不為兒女情隔船琵琶自愁思何與江州司馬事
為渠感激作歌行一寫六百六十字白樂天白樂天平
生多為達者語到此胡為不釋然弗堪謫官便歸去廬
山政接柴桑路不尋黃菊伴淵明忍泣青衫對商婦

送來賓宰

君作來賓宰聽我說來賓蠻俗無王化當為王化人有
民無租賦租賦出商旅逐利遭重徵商旅亦良苦能放
一分寬可減十分怨不愛資囊索但愛了支遣民窮賴
撫摩官貧俸不多但得百姓安俸薄其奈何勿謂朝廷
遠官職易遷轉律已貴庶勤御事要明斷自縣辟為州
指日為太守須知早歸來瘴鄉不可久

題姚雪篷使君所藏蘇野塘畫

高者為山坳者為壑為烟為雲渺渺漠漠水鳥樹林人
家聚落騎者何人舟者未泊三尺紙上萬象交錯天機
自然神驚鬼愕嗚呼此吾之故人野塘蘇元龍之墨迹
中有石屏老淚痕又為野塘添一筆

章泉二老歌

在昔商山傳四皓又聞香山圖九老異鄉異姓適同時
爭如章泉一家兄弟登期願章泉之上兩山下有地可
宮田可稼伯也蚤休官季也相約歸林泉名動京口耕

谷口山中有詩天下傳一生得閒兼得壽皓首龐眉世
稀有竹隱先生八十三定菴居士七十九客從遠方來
亦是六十叟手把一枝梅來奉兩翁酒問翁何以致遐
齡請翁細說吾細聽不燒丹不學仙五行有常數天所
稟賦焉人生一氣統四體衆人斲喪吾能全要知養生
無他術日多喫飯夜獨眠承翁見教謝翁去兩翁殷勤
留我住是夜醉眠苔竹軒夢見山靈向我言翁之所說
皆不然兩翁盛德合乎天天與遐齡五百年

毗陵呈王君保使君 二首

姑蘇道上天酒星醉筆寫出雙龍形墨迹從橫奪造化
蜿蜒滿壁令人驚一龍翻身出雲表口吞八極滄溟小
手弄寶珠珠欲飛握入雲中拳五爪一龍排山山為開
頭角與石爭崔嵬波濤怒起接雲氣不向九霄行雨來
萬物焦枯天作旱兩雄壁隱寧非懶真龍不用只畫圖
猛拍闌干寄三歎

何人筆端有許力捲來一片瀟湘碧摩挲老眼看不真

怪見層波湧虛壁天慶觀中雙黑龍物色雖殊妙處同
能將此水畜彼龍方知畫手有神通龍兮水兮終會遇
天下蒼生待霖雨

南嶽

南雲縹緗連蒼穹七十二峯朝祝融凌空棟宇赤帝宅
脩廊翼翼生寒風朝家遣使嚴祀典御香當殿開宸封
願福四海扶九重干戈永息年屢豐五嶽惟今見南嶽
北望乾坤雙淚落

玉華洞

憶昨遊桂林巖洞甲天下奇奇怪怪生妙不可摹寫玉
華東西巖具體而微者神工巧穿鑿石壁生孔罅玲瓏
透風月宜冬復宜夏中有補陀仙坐斷此瀟洒空山茅
葦區無地可稅駕舉目忽此逢心駭見希詫題詩媿不
能行人亦無暇

祝二巖

僕本山野人漁樵共居處小年學父詩用心亦良苦搜

索空虛腹綴緝艱辛語餬口走四方白頭無伴侶前年
得嚴粲今年得嚴羽我自得二嚴牛鐸諧鐘呂粲也苦
吟身束之以簪組遍參百家體終乃師杜甫羽也天姿
高不肯事科舉風雅與騷些厯厯在肺腑持論傷太高
與世或齟齬長歌激古風自立一門戶二嚴我所敬二
嚴亦我與我老歸故山殘年能幾許平生五百篇無人
為之主零落天地間未必是塵土再拜祝二嚴為我收
拾取

懷家

白髮出門來三見梅花謝客路有幾年歸心無盡夜
強言不思家對人作意氣唯有布被頭見我思家淚
三年寄百書幾書到我屋昨夜夢中歸及見老妻哭

江湖小集卷七十八

欽定四庫全書

江湖小集卷七十九

宋 陳起 編

戴復古石屏續集

飲中

布衣不換錦宮袍
刺骨清寒氣自豪
腹有別腸能貯酒
天生左手慣持螯
蠅隨驥尾宜千里
鶴在鷄羣亦九臯
賢似屈平因獨醒
不禁憔悴賦離騷

靜齋張敏則舍人贈詩因用其韻為酬

胸次詩書一派清學如耕稼到秋成十年閉戶存吾道
萬事無心逐世情葉落花開關氣數山長水遠是功名
摩挲老眼看新貴九鼎鴻毛孰重輕

客遊

不能鬱鬱窟中藏大笑出門遊四方與世周旋持酒盞
觀人勝敗坐碁坊倒餐甘蔗入佳境畫著錦衣歸故鄉
此志十年猶未遂倚樓心事楚天長

新安寒食

不擬今年到歙州要知行止豈人謀一百五日客愁惡
三十六峯春雨愁老矣此身猶道路淒其歸夢繞松楸
花瓢仙子無由見千里江山負遠遊

烏聊山登覽

抖擻罽塵上翠微旁溪寺上坐題詩忽聞啼鳥不知處
細看小山無厭時風掃雲烟開晚景人攜香火謁荒祠
客來千里登臨意說與時人未必知

癖習

平生癖習未全除，虛事驚心實事疎。
為惜落花慵掃地，每看脩竹欲移居。
逢人共作亡何飲，撥冗時觀未見書。
爭奈一貧隨我在，思量不若把犁鋤。

趙升卿有官不肯為里居，有賢聲訪之於深巷
中

深居陋巷不妨幽，翠竹當門水滿溝。
每遇事來先覺懶，欲為官去又還休。
田園自樂陶元亮，鄉里多稱馬少游。
除却讀書無所好，有時閒作北巖遊。

即化成巖也

括蒼石門瀑布

少泊石門觀瀑布明知是水却疑非亂拋雪玉從天下
散作雲烟到地飛夜聽蕭蕭洗塵夢風吹細細濕人衣
謝公蠟屐經行處聞有留題在翠微

杜門自適

世事茫茫心事灰衆人爭處我驚回閉門不管花開落
避俗唯通燕往來富貴在天求不得光陰轉地老相催
平生任達陶元亮千載神交共一杯

登快閣黃明府強使君和山谷先生留題之韻
未登快閣心先快紅日半簷秋雨晴宇宙無邊萬山立
雲烟不動八牕明飛來一鶴天相近過盡千帆江自橫
借問金華老仙伯幾人無奈入詩盟

秋日病餘

桂子吹香風露深老夫吟了聽蟬吟秋來賸有行山興
病後全無涉世心詩苦積成雙白鬢酒豪輕用萬黃金
平生意氣今如許獨抱傳家一破琴

都中懷竹隱徐淵子直院

少年行脚白頭歸不負平生汗漫期望斷海山雲漠漠
愁生江路草離離一篇王粲登樓賦幾首巴陵送別詩
獨倚篷牕無意緒瓦盆傾酒憶金卮

趙用甫提舉夢中得片雲不隔梅花月之句時
被命入朝雪中送別用其一句補以成章

一時議論動諸公有詔西來玉節東又見清明更大化
好趨丹陛奏孤忠片雲不隔梅花月一雪翻成柳絮風

把酒莫辭今夕醉明朝車馬去匆匆

卷七十九

江湖小集卷七十九

欽定四庫全書

江湖小集卷八十

宋 陳起 編

戴復古石屏續集

九日

今日知何日他鄉憶故鄉
黃花一杯酒白髮幾重陽
日晚鴉爭宿天寒雁叫霜
客中無此醉何以敵淒涼

郭外翁

郭外生涯少城中糴米稀
種花無處賞挑菜入籃稀
風

金少府人卷之三
卷八十
撼傾歌屋寒生藍縷衣此翁何所樂談笑傲輕微

山村

野老幽居處成吾一首詩桑枝礙行路瓜蔓網踈籬牧
去牛將犢人來犬護兒生涯雖樸略氣象自熙熙

吳門訪舊

孟良夫侍郎
有藏春園

去此十三秋重來雪滿頭鏡顏如老醜詩骨帶窮愁鳥
語新晴樹人尋舊倚樓藏春門下客一半落山丘

答祝融

秋風吹拄杖直到祝融巔目擊三千界肩摩尺五天扶
桑陽谷畔青草洞庭邊雲氣無遮障分明在眼前

山中少憩

地僻人稀到山寒水欲冰聞鐘知有寺見犬不逢僧斷
隴森喬木顏簷挂古藤斜陽照孤影詩骨瘦峻嶒

鄂州戎治靜憩亭

幽亭何處尋巖樹碧森森獨坐生雲石少安經世心伴
人雙鶴立多事一蟬吟提劍翻然起中原秋草深

趙端行杜子野遊虎丘有詩僕因思舊與子野
同宿唱和留題

出城十里許有此一山門丘在虎無迹池清劍有痕孤
松冠巖頂萬竹繞雲根借問東軒壁舊題存不存

杜仲高高九萬相會

杜癖詩無敵高髯畫絕倫笑談能不朽富貴或成塵今
古多奇事乾坤幾怪民相逢不容易一醉楚江濱

懷趙德行

學慈湖從
趙元道楚

所學源流遠澹交滋味長
看來渾易與別去自難忘
獨客夢千里佳人天一方
細觀賓退錄亦足慰淒涼

鄭南夫雲林隱居

一來陪勝踐再到惜蹉跎
記得山中景行尋竹外坡
天寒梅信早海近雁聲多
烟渚浦洲外時聞款乃歌

白鶴觀

荒徑行如錯蟠松看轉竒
鳥聲人靜處山色雨晴時
賒得溪翁酒閑尋道士碁
箇中有佳趣莫怪下山遲

三山宗院趙用父問近詩因舉今古一憑欄夕
陽山外山兩句未得對用父以利名雙轉轂對
上句劉叔安以浮世夢中夢對下句遂足成篇
和者頗多僕終未愜意都下會李好謙王深道
范鳴道相與談詩僕舉此話鳴道以春水渡旁
渡為對當時未覺此語為奇江東夏潦無行路
逐處打渡而行深山界上一渡復一渡時夕陽
在山分明寫出此一聯詩景恨不得與鳴道共

賞之

世事真如夢人生不肯閒利名雙轉轂今古一憑欄春
水渡旁渡夕陽山外山吟邊思小范共把此詩看

夢與趙用父王子文陳叔仿相會甚款

鼎足當州縣別來音相稀故人俱顯達吾道亦光輝三
鳳夢中見孤鴻天外飛應憐江海客白首未成歸

焦山

江接海冥冥山連島樹青似非人境界宜有佛宮庭藏

壓蟠龍宅潮滄瘞鶴銘西巖更清絕心與酒俱醒

金山

水湧孤峯出波聲日夜聞重巖戍鐵屋雙塔礙行雲
天地八窓迥江淮兩岸分登臨多感慨北鴈又成羣

訪古田劉無競

潛夫宰建陽有聲人言
自有建陽無此宰也

前說建陽宰古田今似之難兄與難弟能政更能詩
文字定交久江湖識面遲人言花萼集俱受水心知

濠州春日呈趙教授

體國

柳似眠初起梅雖老可觀
冰開水自活風暖雪泥乾
得酒忘為客談詩不論官
無人知此意一笑對黃冠

自漳州回泉南主僕俱病遣懷

雅興難忘酒羈懷不耐秋
坐窮思賣劍扶病強登樓
適有坐中客來從邊上洲
所談驚老耳身世併成憂

舟中九日

水澁勞牽纜天寒早雨霜
沙頭沽濁酒船上作重陽
籬菊一枝瘦溪魚三寸長
客中成小醉亦可慰淒涼

哭澗泉韓仲止 二首

雅志不同俗休官二十年
隱居溪上宅清酌澗中泉
慷慨傷時事淒涼絕筆篇
三篇遺稿在當並史書傳

忍貧長傲世風節似君稀
死後女方嫁峽中兒未歸
門人集詩稿故卒服麻衣
澗上梅花發吟魂何處飛

江湖小集卷八十

欽定四庫全書

江湖小集卷八十一

宋 陳起 編

戴復古石屏續集

樓上觀山

九陌黃塵沒馬頭
人來人去幾時休
誰家有酒身無事
長對青山不下樓

林下得月以木陰蔽遮為恨

夏日思栽千樹林
月明恨不掃繁陰
眼前物物皆如此

世事何能兩遂心

越上青店候別楊休文

千載江湖共此心
老來相見怕分襟
手搔白髮望君至
車馬不來溪水深

衡陽舟中

蕭蕭風雨送行舟
小泊垂楊古渡頭
不忍經行江上路
落梅片片是詩愁

村景

簫鼓迎神賽社筵藤枝搖曳打鞦韆坐中翁嫗鬢如雪
也把山花插滿顛

溪上

山腰有路穿脩竹溪面無橋涉淺沙夾岸人家小園圃
秋風吹老木棉花

周子益年八十赴殿

七尺漁竿八十翁釣絲輕裊荻花風功名未遂英雄老
人道磻溪即箇中

拋却漁村老釣竿
手遮西日上長安
青衫著了尋歸路
莫過羊裘七里灘

觀捕黃雀

披綿爭啄晚禾秋
決起森然網扼喉
一飽等閒輸性命
知機萬不及沙鷗

九日

醉來風帽半欹斜
幾度他鄉對菊花
最苦酒徒星散後
見人兒女倍思家

贛州上清道院呈姚雪篷

短牆不碍遠山青
無事燒香讀道經
時把一杯非好飲
客懷宜醉不宜醒

無題

憶聞春燕語雕梁
又聽秋鴻叫斷腸
一縷沉煙飛不過
兩樓相對立斜陽

到南昌呈宋愿父伯仲黃子魯諸丈

一秋無便寄平安
新雁聲聲報早寒
昨夜檢衣開破篋

去年家信把來看

李敷文酌別席上口占

客子明朝早問程
尊前今夜若為情
使君亦恐傷離別
不使佳人唱渭城

題梅嶺雲封

東海邊來南海邊
長亭三百路三千
飄零到此成何事
結得梅花一笑緣

綠陰亭自唐時有之
到今五百年盧肇二三公

題詩之後吟聲寂寂久矣亭前古木不存綠陰
之名殆成虛設今詩人李賈友作山尉於此寔
居此亭公事之暇與江山風景相應接境因人
勝見於吟筆多矣友人石屏戴復古訪之相與
周旋於亭上題四絕句以記曾來

五百年前作此亭亭前古木綠陰清而今古木無存者
賴有新亭繫舊名

慄慄秋風吹客襟唐人遺迹宋人吟浮雲世事多遭變

不獨此亭無綠陰

遠山橫碧一溪清
白鳥飛邊落照明
吏散庭堦一無事
綠陰亭上又詩成

政是國家多事秋
渝川縣尉亦風流
吟詩不廢公家事
坐使孟郊輸一籌

既別諸故舊
獨黃希聲往曲江稟議未回不及

語離 二首

別盡諸君不見君
客愁多似海南雲
一聲何處離羣鴈

那向江村靜處聞

老年懷抱晚秋天欲去思君重黯然聞道歸來有消息
江頭錯認幾人船

寶覺僧房

溪近泉聲在井邊月移梅影到牕前水沉烟冷燈花落
半夜酒醒人不眠

題尹惟曉芙蓉翠羽圖

何人妙筆起秋風吹破枝頭爛熳紅翠羽飛來又飛去

一心祇在蓼花叢

廬山馬上

青松路逕白雲關有客來尋半日閑
十載灞橋驢子上爭如騎馬看廬山

巾子山翠微閣

雙峯直上與天參僧共白雲栖一卷
今古詩文吟不盡好山無數滿江南

贈饒叔虎

談易論命
多奇中

中年多病早衰翁詩不能工枉受窮郊島五行君識否
要知我命與渠同

湖南漕李革夫被召乃丐歸

浪說歸朝歸豫章新君萬柳百花旁何如表奏光明殿
乞取東湖作醉鄉

軒冕難遮兩鬢華官居雖好不如家一心懶上朝天馬
要趁春風歸種花

招山乃詩人劉叔儼故居朱清之得其地清之

赴南京中道而返就招山下築不久亦去世

二首

半路袖回攀桂手一生才遂買山心
要知此老風流處來向劉郎吟處尋

有錢可買滄浪景無術能還夢幻身
一段江山寄愁絕百年不見兩詩人


清明傷感

客中今日最寒心憶著家山松樹林
白石岡頭聞杜宇對他人墓亦沾襟

寄劉潛夫

時在建康作制幹唐人
詩芳譽香名滿數車

八斗文章用有餘
數車聲譽滿江湖
今年好獻南郊賦
幕府文書有暇無



江湖小集卷八十一

欽定四庫全書

集部

江湖小集卷八十二至
五

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄貢生臣李 楹

欽定四庫全書

江湖小集卷八十二

宋 陳起 編

利登散稿

青陽洞天呈青陽主人曾少裕

兩岸蒼蒼峭天柱
停策崖邊喚舟渡
青巾羽客打舟來
驚起靈蛇絕溪去
千年神漿不自惜
萬里晴天安得雨
但見飛流落半空
空中此水來何處
巖下猶涵太古泉
安知上不通銀浦
蒼藤半濕苔蘚昏
石罅無根迸孤樹

洞門一隙僅通人可惜鑿空開洞府乾坤明晦自有時
突然棟宇那非數開闢豈無人到來巖崖尚絕猿猱路
先生朝昏息丹巖萬壑歸心心不語瑤磬一聲天壁寒
白雲紫霧驚相顧

雜興

渺渺江河流蛟龍所為沼高山苟無松不如低平阜潔
身服休美榮辱非所囿孤航何翩翩獨往不我覲眷言
友仙喬寤寐耿長抱安得翔風鸞棲神此蓬島我昔遊

蓬萊道過崑崙山青壁峭千仞中分兩徑前上逕險且
難行可求神仙下逕極夷易蛇虺交蜿蜒毫釐一殊軌
安危異千年棄之從上征高步追飛鸞勿謂下途易下
途前更艱

滯凍釋陽淵嫩和改陰圃草色誰與媒青青一何驟美
人振長袖竚立傷年少芳紅不少留况乃飄殘照飄零
可奈何四氣如環珂白雲雖有反不反亦已多曲流傷
直水遠蔭無近柯誰令天有漢杳杳隔秋娥桂林有秋

色洞庭有秋波濯衣千仞溪滌垢非悅眼涓辰萬里遊
寧以霖雨緩丈夫秉道心摧挫志逾勉豈如甘與橙南
北隨所變大鵬擊逍遙鷦粒有餘羨嗜好非固殊夫亦
各所便

朝吾出東門回首瞻長坂淒然數根松枯華困凌踐時
春百卉肥綠苔亦青婉如何虬鳳姿獨爾失蘄岸伐明
根下摧樵炊枝上剪忍此棘荆蕃寧此棟梁爨棟梁君
自遺文木固不賤

西登巫陽峯，悵望高唐女。靈顧不須臾，而自虧澄素。竚
嘆為君懷，惜此蘭臺賦。不惜蘭臺賦，惜此天下雲茫茫。
八紘中是非，誰得論。

松栢托茂林，高不尋丈。至寸喬附太山，未長已千里。置
身患不高，餘事安足擬。遊必蓬萊遊，棲必崑崙棲。仙遊
必祥雲，仙茹必靈芝。鳳凰雖自饑，安食固不回。癡鳶嚇
腐鼠，可笑空自疑。

我昔此園遊，寒梅吐孤艷。重來幾何間，叢青條以遍。誰

云花與葉同樹不相見

昨宵狂風起折我桑樹枝徘徊履桑園賤妾當何依豈
無薜蘿生亦有柔苧肥素情在君子綺帛良重斯無桑
蠶安食無蠶我安衣長嘆反初路渺渺天四垂

北溪蒼山謀避寇念青陽蒼山徘徊不忍作古
調開之

憶我昨選勝瓶錫來蒼山上巖豁萬里下峽窮重玄謂
此已勝絕可以無梅川後同北溪遊青陽稅塵鞍險流

貫地軸危瀑垂天關雲氣夜結構如有飛來仙迥然幽
且深直可無塵寰乃知天壤寬淺日非所沿亦豈無勝
此天不丐我閑豺虎白日行俘掠無崖巔此境亦莫保
惜此時運艱二君皆駿人銓時洞遐觀考槃擇澗谷取
數良已慳天尚不子與而遣纏世患十月崆峒路霜風
吹羈單回首舊遊處野狐嗥暮烟天地豈不寬我身靡
所安思古英達士豈皆薄龍盤求隱有不可勲名乃窮
年困衡心慮間庸非大任緣勉哉慎所從致主或不難

逃死復誦此自笑還自憐念我昔時語夢驚老雲間茲
事今已晚誰能復長嘆

梅川莫令君拉蒼山諸詩友用予松風首句為
韻招予遊金精至而盜作不果遊走佛巖有感
此行為山來至此事已非雲火四地動御風誰與期剥
床漸及膚欲去迷所之蒼黃走澗谷勝遊翻在斯石梯
盤七折頓豁萬里竒擁巖千脩篁中著寒泉飛天壤有
此景惜我前不知逃難乃邂逅自愧還自悲山風送萬

古開闢知誰為亦有如我徒慷慨來登茲懼難本因此
不悔乃攀窺天亦無如還更供去聲愛日暉平生江海眼
此志良未癡忽憶家山遠寒馬鳴相依母子各一方而
皆窘賊圍欲歸莽無從痛毒沾我衣

盜犯金川境扶侍母妹復走興安有懷

歎歲古多盜於今起豐年村村遞遷偏旗鼓莽相連

以賊

一村脅一村受旗鼓
村村相脅遂遍數縣

虬螭信有力復此走興安淋漓雨

萬壑駭浪驚前山携持母妹孤寄此一葉寒猶勝去年

冬我身落梅川母子各一方而中隔妖躔呼酒相勞苦
茲猶幸團樂百年幾星霜十九落憂患人生亦何樂四
顧愁我顏平生百事貧所得惟林泉亦復不過取溢量
常恐顛天公尚不與謂我取傷蕪前登馬崗雲回首東
南天惻惻不得語蕭然淚潺湲

子與子實避盜同走崆峒子以其年十一月歸
侍金川踰月而子實走豫章閱三載子實携琬
妹歸梅川道經盱子自金川侍親歸會之酒酣

作是詩以餞別壬辰十一月二十七日

聞君歸梅水經我鳳凰山走馬來相會匆匆具杯盤君
行今已反我歸夢尚寒回首舊遊處白骨猶荒煙昔年
崆峒別心已死生看今日寒林霜收悲暫欣懽善還已
不期惡別似不難世事未可極臨分更盤桓

田家即事

小雨初晴歲事新一犁江上趁初春豆畦種罷無人守
縛得黃茅更似人

癸巳十一月二十五辭家雪甚作愴然有懷

歲暮遊子歸余始為行客朔風萬里長吹雪犯巾幘臨
行不言苦不忍母心惻乾坤迫短景寒日易傾仄冰池
綠骨巉凍車瓊網澁一寒忍已熟浪出還自責撫劒睨
前岡雲重楚天黑

董叔宏為予道溪莊勝趣賦古調

一澗潺潺瀉煙樹流到溪莊平不度竹風淒瑟夏猶寒
石氣蕭森朝自霧時平古寨尚留名世否誰人此逃數

乾坤一轉地有靈日月無邊江又暮幽潭聞說尚龍宮
石屋安知非洞府願君半天更高樓送此到海長溪去

野燒

初如螢燈一點明須臾數點如疎星忽然連亘勢不斷
儼如金蛇破夜驚縱橫又如長虹百尺渴奔飲江罷蜿
蜒天矯勢欲凌青冥竒光異色不可以正視倒影茅屋
但覺燈奕光熒熒我聞昔者王家有寶鏡鏡橫八寸名
紫珍塗以金膏傅珠粉碧光絳氣連屬日月含天庭又

聞西方聖者釋迦子祇林演法導羣生祥光自頂湧不
盡三千世界合作一色白月明今之竒光異色無乃是
不然安得有此瑞彩突兀來崢嶸天公有妙手變化誰
能名忽從青青現有象還復槁滅歸無形遺燼尚足澤
萬物生意行又盈乾坤乃知元氣本不死不逐火化常
存存君看餘澤滋萌達豈彼死灰能神靈秋風浩蕩吹
萬寶拭目千室倉箱盈

贈南豐宰趙虛齋二章

芳鮮桃李花
燧奕春風道
春風不可名
桃李花自笑
人閑雙睫淨
玉立軍峯峭

有口寧食薇
有身寧衣褐
居然觀八荒
獨立招皓月
清風亦知人
蕭蕭動幽樾

友人自臨川來携庾臺趙先生與曾丈諸葛帳
幹丈聯和康樂三谷詩句奇格老追遺韻千年
間因難見巧玉疊瓊重殆非窘才者所宜逐響
矣不鑿蕪庸欲藉手以竊風斲之誨輒依韻為

四章因承教二丈

謝遊半天下晚歲來茲山平生未識見驚此紅玉泉散
珠流芳詞策瓊想遺賢上探霞生巖下厯雲度阡名存

有瑤刻事往如金烟

南康遺事有埋金窖中者忽晝發之失金

世有好奇士

剪茨闢繩筌

魏都賦闢繩之筌緒均

希此紅泉名欲作疑信傳勝

境會即是何必戶牖前洗耳天河邊聽之流潺湲語發
謗已兆况復然不然

先生學者師文筆峭如山有時騁奇怪倒引天上泉達

觀古有作奇探今孰賢我亦頗自好種芝東南阡笑倚
巖間月冷歌松下煙陸耘秀新插水捕排舊筌聞師有
紫書願啟黃笈傳三月下汝江支離拜師前歸來鳳岡
上藉蘭漱潺湲服師雙麟芝至今腹果然

吾聞煙霞外粵有天桂山其中多仙子傲睨遊乳泉三
仇久已絕七試嗟獨賢願持瑯玕樹種之瓊瑤阡從此
仙子遊上下陵祥煙羽玄師華存靈變通道筌湧龍出

寶臺

呂公云法七層煙浪中化
大龍寶臺三汲江按躍

紹彼真一傳肯如幽求

癡仙景愕不前亦不畫肉芝平地生潺湲所求聖胎凝
視世蟬蛻然

家住姑山下朝暮遊姑山澄潭貫地脉飛流接天泉永棲
無昔老暫遊謾時賢古藤蔓直木蒼檜隨曲阡猶存萬古
月尚照千年煙誰其錄青華嘿然語玄筌紫鋒變窻塵金丹

九液二七變紫
鋒三七變窻塵重此鑑簡傳九障儻不存五靈森在前昨者

攜友朋攀蘿掬潺湲神交善與徒宇宙空茫然
死為善與
鬼仙儔也

沽酒

有錢但沽酒莫買南山田勾引催租人驚散青松烟

春日

幽偏無一事終日自長哦課僕鋤荒圃邀人補斷蓑為
貧沽酒少因病著衣多昨夜岡頭雨春風生綠波

寄黃希聲

相會不幾日相別又經時居然感我懷何以寫所思舉
目皆我友我心知者誰知心而久離此情悲不悲八月
寒氣高芳蓮謝幽池時運迅不留俛仰黃華暉少年不

再得而不從以嬉蕭條旅館秋滿耳寒蟹啼

晚步

住在山塘深更深門前落葉與堦平高人聽鶴來相過
野老因樵熟識名一水欲流山影去斷雲時伴燒痕生
悠然獨步蓮峯夕十里松風秋月明

觀雪溪傍

平昔起常晚茲晨獨不眠乍驚花遶院頓覺樹連天竹
壓溪頭路水垂巖下泉四時長似此未必有人憐

愛雪不能寐凌晨步水濱
斷梢驚宿鳥倒竹礙行人
疊疊堪數層層屋頓勻
梅花無處認唯覺暗香春

山齋坐不穩復此出衡門
溜澁冰還結風高竹自翻
凍流看欲濁饑鳥啄仍喧
好是今風景令人憶故園

密雪飛零亂開牕坐小軒
鳥寒飛不去鴉啄俛仍翻
稚子爭圍塔山翁半掩門
那堪長皓色終古照乾坤

郊外

春色到江斷野香涵日嬌
鳥穿芳樹語人隔遠山樵

春日

雨過苔猶濕風來戶半開
閑花忽落盡啼鳥自飛來

仙塘茅舍

住在山深處門前數曲灘
近村烟勢闊傍水樹陰寒
釣客嗔棋僻高人借鶴看
只愁山水怪嫌我著儒冠

門對平蕪闊荒田帶水聲
牧童蕪鴨養野老叱牛耕
山暖松花重園春菜子生
杖藜斜日裏籬外白雲橫

莫言賓客少幽僻長莓苔
也有樵人到唯無詩士來
山

風花落盡溪雨燕飛回又覺年光暮庭陰滿綠槐

仙塘

一椽自著此山幽蘆葦蕭蕭繞屋頭野老屢來詢姓字
社人相約賽春秋寒山此去無飛鷺白水初傳有遠鷗
病起偶然成獨往冷烟斜照使人愁

稚子

雙雙稚子戲柴關搏土為人半印錢更過十年那有此
短蓑蓬笠種荒田

後坑茅舍

松風颯颯繞回谿
遙帶居人竹一籬
想自不知雲水好
却令行客立多時

用趙南塘贈黃希聲韻呈南塘

長天漠漠升虬龍
龍光鱗鱗涵紫空
黑雲忽起瀛海上
白日不照寒郊蓬
九野茫茫路如織
我自路絕無途窮
緩商同宮琴再撫
四顧欲駕班麟風

鳳凰一翥千里論
營營鶯蝠爭朝昏
黃河波清縱可待

失計已落千秋渾蹇予生居百代後上究笙典窮珠墳
綠圖丹書竟杳冥嗷嗷宋玉徒招魂

抱樸子五典為
笙簧三墳為珠

江亭

江亭凭望久野色暝蒼蒼古木浮寒霧空山入夕陽水
流前夜月風作早來霜却笑垂綸者因漁亦自忙

走佛巖道中

避亂走佛巖依依絕溪水有客六弟昆遮予訪行事一
云分路亡庶或一不死一云相為命生死同所值遠逝

宿無春近逃寇能至垂涕贈之言此身苦難避山剽無
崖巔兵騎有城市共守固已非分逃豈云是風聞宜邑
郭聚落復煙燬沸鼎無清鱗四瞻誰善地不辰自至斯
乾坤古無際

梅川行

我來蒼山未一日平固

屬石城

弄兵剽寧邑此時烏合猶

懼官風鶴入耳心早寒來無與角去無捕堂堂墟邑自
來去墮軍長寇那可言初時數百俄數千受旗翕忽亘

千里聚落一燼如捲水就中閨女尤可愁肩緝背篋
步牽牛重重闕地搜伏窖謂無白日再天曉我時避
盜逃佛巖親眼見盜循山南紅葛蒙頭履躔頂縈身
錦被翻紅浪招賢三尺刃如霜夾以巨盾張朱鎗皇

皇我寨神呵護山上澄明山下霧

招賢人能製刀賊用之又習張朱二

家鎗法時諸山反寨上皆澄瑩見盜來往而寨下一逕達賊營霧迷四寨

路迷躑躅不敢

前依依遂犯連湖去六盜飛紅登其巔

賊犯我寨以霧不果遂犯

連湖入之環山叫呼聲連天紛紛毬雪半空落赤子甘心

自投壑

人自擲巖下而死
紛如雪毳下有聲

州忘縣邑縣忘鄉我實自弱

非賊彊捐金買靜恐不受尸祝鼠輩拖朱黃何人此日
不為盜已矣獨嘆吾生忙已矣獨嘆吾生忙乾坤回首
空斜陽

秋步述所見

趁晴收斷薪破曉循幽浦山寒樹欲風雲重天將雨
兔奔初種畦雞拾穫殘畝葉深樵無蹤水落魚可數
幽草不須生千林秋已素

梅花吟

落日孤煙寒不度梅花忽見橋西樹疎影猶含澗外雲
暗香欲薄山前霧寒死不作女兒面幽絕却懷廊廟具
但知殿後壓年芳誰識攬先啟春路初開寧無仙子來
已落尚恐神明護後來紅紫競春風此已成功鼎鼎去
早起見雪
折竹聲高曉夢驚寒鴉一陣噪冬青起來簷外無行處
昨夜三更猶有星

次琬妹月夕思親之什

追錄

緩作行程早作歸倚門親語苦相思
白頭親老今多病
不似當初別汝時

田父怨

黃雲百畝割還空
垂老禾堂泣
晚春償却公私能幾許
販山燒炭過殘冬

野農謠

去年陽春二月中
守令出郊親勸農
紅雲一道擁歸騎

村村鏤榜粘春風行行蛇蚓字相續野農不識何由讀
唯聞是年秋粒顆民不收上堂對妻子炊多糴少饑號
啾下堂見官吏稅多輸少喧征求呼官視田吏視釜官
去掉頭吏不顧內煎外迫兩無計更以饑軀受笞箠古
來坵壠幾多人此日孱生豈難棄今年二月春重見勸
農文我勤自鍾惰自釜何用官司勸我氓農亦不必勸
文亦不必述但願官民通有無莫令租吏打門叫呼疾
或言州家一年三百六十日念及我農惟此日

兩過黃伯厚皆不遇留詩別之

兩過安禪寺皆言尚未歸情知相見近猶欲復來辭灘
淺舟行澁風輕雨下微白雲回首地天濶柳絲絲

冬日

藤果累累熟山晴自遶簷斷薪經雨濕野菜著霜甜詩
少客相笑家貧鶴不嫌誰能更惆悵癡坐卷疎簾

玉臺體

兩彎弓月眉端照一朶鬆雲鬢畔歸欲默不能言不可

嬌心無著凭青衣

六曲鴛屏紫玉環
寢衣紅地繡雙鸞
相思未必君如我
一夜芙蓉翠露寒

行雲一夢去無蹤
鳳尾羅衾翠幔重
人壽幾何禁此別
海棠花下悔相逢

朱楊冉冉四垂春
綠霧低迷慘去程
斜日半山烟半嶺
人生不合遇傾城

貴谿有石相背而生俗名之背夫石余謂妻安

昔夫抑夫棄之耳易之曰夫棄石

雙石嶮岨倚雲瘦背立蒼蒼兩成醜不知底事忤夫君
千載春風不回首妾身雖棄妾不寃混沌初開已相守
君興蟠天雲妾亦助君去終當為霖九地回白日昭昭
此情慄

臨平春日有懷

少年賤生理嗜書彊解事長懷希南風趨數慙北鄙乾
坤雙鬢改日月寸心死誓從鹿豕遊乃復叨一第兩年

三作別雲霧生馬耳臨平二月春花事歸桃李獨尋處
士梅三肅湖邊水一官未得仕畏首復畏尾旁觀未知
羞自愧已無地懸知簪紱禽擾擾事萬起終當綠霧中
友彼乘龜子南柯不世勲僅足雄衆蟻

史記舜歌南
風紂歌北鄙

觀溪流

西山連夕雨漲此百尺渾怒濤響半空氣可飄崑崙一
朝勢力盡枯葦有不能洋洋溟渤寬終古無虧盈

感興

聖域久蕪漫功利時競趨管晏苟有實安必世唐虞開
明周孔心賴有伊洛儒古來正其心平治信有餘彼哉
典午時相師談清虛未知千載人視今又何如

又

寂寂卧空晝憂懷忽無端攬衣亂西澗復此凌西山春
事已無多半消霜霰間狂風更甚雨時蔽江南天寒草
昔衰靡及茲秀平阡日晚幽陽生餘光草中妍徘徊桃
李花瑟瑟飄寒烟

別遊天台雲卧住

半月陪杖屨此別情詎忘平生兩知心蹤跡長相望茲
遊天相之簷雨對夜牀旅行得心朋在客如家鄉如何
遽此去泛彼天台航知君愛竒觀赤城有霞光儻逢五
百尊問我今行藏詩骨瘦未改雙鬢塵已蒼

至家

明時射策難為合塵世求名本是浮整頓書籤還夜課
增添酒甕與寒謀羞逢山友長低面悔把漁竿不到頭

盡日小樓凝遠望白雲黃菊十分秋

永新道中

冉冉螺川路茲行本不期地平風到疾山僻雪消遲漸
遠鄉人少初行歧路疑斷雲無意緒直欲上梅枝

月

哀哀半規月前日猶盈輪冉冉幾何間光彩倏以淪至
精孰如斯猶不逃虧盈天地亦無根萬化無長存矧茲
寄一形隨天運渾冥若無重素規誰信天地精

金川早行

著野霜方新照天日未出蒼茫霧氣昏慘淡一片白吾
疑九天外與此同一色

和希聲蓮華樵人遇仙行

蘆溪之山高插天蓮峯更壓蘆溪山峰頭青壁絕千年
誰知玉闕藏神仙平明採樵陳氏子五雲深處樓臺起
中有七仙白玉冠方瞳射人秋自寒臺前一道白蓮泉
七始花開一成蓮固知此子無仙骨祇以崆峒入仙室

低頭乞命却走回尚復褰裳取蓮實歸來疑信互相傳
樸哉此子非妄言安知瓊樓玉室峭千尺即非面前
崔嵬一片石安知世人俗氣厚如山翻把瓊樓玉室作
石看亦非仙人幻作石世人俗眼自不識安得鴻都道
士白玉簪持我此詩扣青壁

仙塘即事

山齋臨薄霧徙倚杏花枝獵客驚熊館行人指鸛池為
貧鋤藥賣因懶上陂遲林外孤烟起遙知日午時

衡陽贈定父詠常

半世擇交友深知僅數人情親無語忘歲久轉心真世
亂身難定話長天易晨相逢原不料一笑鴈峯春

次蒼山晚出聞汀寇之什

山齋無一事步到白蘋洲灘近溪聲夜雲寒石氣秋烟
塵深冉冉天地入悠悠回首東南路干戈半白頭

寶陀清賞夙慕展遊願不從心因成小詠

寶陀十里路此日想同遊萬古不收雨四時長是秋樹

寒烟半擁山濕霧長流獨我思歸苦無因到上頭

江湖小集卷八十二

欽定四庫全書

江湖小集卷八十三

宋 陳起 編

李濤蒙泉詩稿

南山

南山思美人也彼美人兮在南山之陽豈不爾思道阻
且長彼美人兮在南山之側我不見兮寤寐思服彼美
人兮悠悠我思何以予之瓊瑰玉珮

南山三章章四句

登高丘而望遠海

登高丘望遠海萬里長城今何在坐使神州竟陸沉夷
甫諸人合殖醢望遠海登高丘知我者謂我心憂不知
我者謂我何求歸枕蓬萊漱弱水大觀宇宙真蜉蝣

讀阮籍詠懷十七首

人生天地間如花開春時遇晴即欣榮遇雨還離披晴
雨由上蒼汝花何悲為顯允阮嗣宗放達世所推憂思
獨傷心作為十七詩感慨懷辛酸似未達天理既好王

子喬又惡輕薄子善善又惡惡好生而惡死如何得微
稱口不挂臧否

處事

處事無心萬象春任教逆境自橫陳籠中無療家貧藥
門外有催詩債人酒盞濶踈瓶久卧文書散亂案多塵
生前富貴非吾願肯學癡人問大鈞

詩社中有赴補者

有詩千首可成名萬戶侯封亦可輕自是高標凌富貴

肯隨餘子逐恩榮君遊壁水甘芳餌僕為銓衡上玉京
水鏡蘭坡各求第詩盟似未十分清

新年開義館教族屬子姪作詩勉之

日與聖賢居其中樂有餘但存三寸舌讀盡五車書學
問勝金壁功名特土苴先當分義利毋作小人儒

蘭坡過省

俯隨韁鎖就科名可笑蘭坡未苦清不管北山怨猿鶴
竟從南海掣鰲鯨賞延於世愧在我思濟斯民同此情

軒冕儻來來則受未來猶可以詩鳴

詩友作涉江采芙蓉觸撥鄙思亦成一首

涉江采芙蓉江水濕我衣
鴈搗不憚行將以遺所思
所思不我見持此將安歸
野花逞姿媚衆好紛莫違
此物何足歎但傷愛者稀

春晝回文一首

茶餅嚼時香透齒
水沉曉處碧凝烟
紗牕閉著猶慵起
極困新晴乍雨天

贈染花徐仲湘

頃刻花開奕葉光
花間竒字兆災祥
神仙幻術從來有
昔日韓湘今仲湘

雜詩十首

今取其四

滔滔東流水赴海無歸期
亭亭右轉日今茲復來茲
人生寄天地百年七十稀
思慮復營營恐為達者嗤

燕雀賀厦屋蟲蟻慕腥羶
野花引飛蝶古木來嘶蟬
秋天百蟲吟春天百禽喧
翟公真闇事喜愠見色言

明主不棄士我自志山林爵服豈無華才疎力難任鳥
向深山棲魚由深淵沉吾亦愛吾廬高歌復微吟

深巖有老翁龐眉鬚鬢雪夜半呼我名授我微妙訣字
畫古籀樣體勢訛復缺雙眸忽炯炯須臾竟披閱至今
得其傳心會口難說

琴書

琴書隨分足生涯只灌園畦亦自佳行狀是崔斯立記
門風似杜少陵家添詩人瘦因中酒解睡魔園只上茶

無事出門覓詩料巡簷指點數梅花

寄范稅院倚衡

在興西
堂今嗣

清敏當年宰寶唐至今遺愛在甘棠
稅苗有例分三等
吏卒無因下六鄉
時異事殊民尚憶
人亡政息事堪傷
如今白納重催吏也坐先生對越堂

次韻平野王子厚登相山不及相過

兒童傳好語王子去求仙
我住亦邇只君胡不惠
然相望
百里外一別五年前
會聚渾閑事鷺鷥盟
要堅

題袁恭父神心精舍

山川城郭同一形市林鴉鵲同一聲吾身本自備萬物
萬物何有非吾身此心虛徹公則明事至能應物能名
君不見神心精舍袁主人叱咤風雷呵鬼神

僧本均乞蒙泉稿

均號
脩然

近聞甘子說僧裏有脩然詩學貫休體心叅馬祖禪箇
中真有得名下豈虛傳索我蒙泉稿因風寄此篇

題盱江王章甫梅境

仙伯當年亭植梅當今天子題品來梅花是我丈人行
見梅不賦梅應吟王君結廬在梅境日與梅兄相追陪
吟詩些起逋仙魂索笑醉銜工部盃吾聞梅乃萬木母
桃為奴婢李輿臺一陽生于萬物始梅花獨先羣卉開
一陰生於萬物成梅實獨先羣蕊胎華寔先天天不違
梅之時義大矣哉紛紛餘論不知本祇說百花頭上魁此
語聞之梅亭翁錄以贈君君勿推

為廣壽長老文傑說嵩溪偈

隔江招手見高亭來謁嵩溪聽水聲縱是遠公今不出
也須強起送淵明

為能仁長老本端說無學偈

十二時中六不收了然無一事為頭禪河既寂無由浪
此岸已離那用舟塵世榮枯真幻夢涅槃生死是浮漚
要知無學用工處十二時中六不收

三月十六日西湖聞杜鵑

纔上蘇堤聞杜鵑杜鵑怪我在天邊平生不作功名想

今日胡為富貴牽辟穀未能那廢食置山所欲尚無錢
但須兩事略如意便占白雲深處眠

訪林龍發

車馬喧闐桃李村誰人復識老梅尊時中只有梅亭姪
來訪西湖處士孫

江湖小集卷八十三

欽定四庫全書

江湖小集卷八十四

宋 陳起 編

樂雷發雪礮叢稿

僕非能詩者而亦好作詩蚤遊諸老之門或謂可與
言詩比歲渝江羅季海西湖胡雪江間亦採而刊之
然傳錄失真甚則雜以他人之作以魚目而混驪珠
僕得盜名之譏矣其可乎前歲歸自京師繼罹憂患
益不復言詩也嘗得李抑杪書必欲為之刻梓即嘗

謝之繼而友人朱嗣賢何堯卿捐泉市梓又有請焉
辭之再四而請益堅余詩本無可傳而諸賢之軫念
者如此僕不得辭矣切念蚤歲雕鏤纂組溺志詞章
既而悔之方將鞭辟近裡以進聖賢之學其敢以詩
傳哉古今言詩莫尚於老杜嘗有詩曰文章一小技
於道為未尊僕果能詩猶犯老杜之戒况不能詩乎
知道者當亮僕之心而有以教之可也時寶祐丁巳
朔樂雷發書

歌行

九疑紫霞洞歌

猗歟奇哉紫霞之洞真天開千變萬狀不可述恍疑幻
出壺中之蓬萊湘濱兩妹不敢到悵望蒼梧雲縹緲爾
來三千三百年斑龍空卧金光草我採姹女江華濱是
為三十六帝之外臣右持綠玉杖左携紫金經長歌天
上謠一呼開仙扃列炬照深窈懸身事幽討羣仙喜我
來驚笑欲絕到何侯撫我頂偉遠拍我肩綠華贈我金

條脫安期分我紅景丹借問此何地指言太虛天翠霞
紫雲張寶幄懸黎結綠盤瓊珞萬疊蒼苔荒石田誰呼
青龍耕紫烟虎嶽銅牆未遍識擬開寶藏紉雲笈嵯峨
水際披蓑翁應是錢鏗釣神龍仙人仙人何多事驚世
駭俗變靈異或跣距足垂天雲或印短趾流沙淪或現
姑射處子身粉霞紅綬藕絲裙或示普陀大士形或持
簪柳垂寶瓔或插鏤象管或結火齊珍或琢玄圃玉或
布祇園金洞中之深不知幾百里但見縈紆屈折一里

一澗水人言有路通桂林乘興欲尋日華君吾聞洞中
大小洞天三十六帝遣列真分治局上界官府應更多
定知此洞今誰屬猗歟竒哉紫霞之洞真天開我上會
稽探禹穴復浮滄海登天台巖谷豈無竒跡此何塵埃
摩抄崖石題惡句記我杖履敲雲來黃涪翁元漫叟目
力一生空宇宙澹巖陽華有何竒枉費篇章劖石竇

烏鳥歌

切莫讀書莫讀書惠施五車今何如請君為我焚却離

騷賦我亦為君擘碎太極圖急來相就飲斗酒聽我仰
天呼烏烏深衣大帶講唐虞不如短後腰形孤吮豪搦
管賦子虛不如快鞭躍的盧君不見前年欖槍照巴渝
今年烽火連成都風塵瀕洞兮白日糝糊殺人如麻兮
流血成湖眉山書院爭餒肉浣花草堂紛剝芻何人洗
兵馬何人致白環何人丸泥封函谷何人三箭定天山
大冠若箕兮高劔拄頤朝談回軻兮夕講濂伊綬若若
兮印纍纍九州博大方君今何之有金須碎作僕姑有

鐵須鑄作蒺藜我當贈君以湛盧青萍之劍君當報我以太乙白鵠之旗杖劍麾旗取將相何用區區章句為死諸葛兮能走仲達非孔子兮孰却萊夷噫歌烏烏兮使我心不怡莫讀書成書癡

寄雪蓬姚使君

贈君昆吾湛盧之寶劍青雀黃龍之巨航懸黎垂棘之美玉都梁篤耨之名香佳人佳人在何處濯足洞庭望八荒藹車緋緋辟芷綠欲往從之道阻長倚寶劍兮翼

軫膠巨航兮沅湘玉以彰君子潔身之德香以表騷人
流世之芳我所思兮隔秋水天吳翕忽蛟螭翔佳人佳
人蹇誰與愛而不見心盡傷

胡料院出示車攻圖仍索俚作

九壤卧龍呼不起乳臭談兵空滿耳書生未識玉帳經
且抱此圖究終始姬家出車詠嬴家小戎詩衛家武剛
扞突騎馬家偏廂走羌夷只今車陣無人識天狗橫空
曬軀血北人以鞍馬為家誰遇奔衝展奇策豫章先生

今孔明胸中森羅萬甲兵天衡地軸妙絕識內陣外陣
何縱橫千枝綠沉列虓虎萬臂黃間張白羽人言險野
難用車公獨規模掩前古車攻圖車攻說八采眉前曾
進徹世人苦謗陳濤斜却向齊門空鼓瑟今朝朱幡富
川頭絕江以北瞻神州李剛政要講車戰南渡勲業應
可收涇水黃鐵山碎雙輪快展出燕地朗誦先王復古
篇他時此筆猶能繼

壺中天歌贈侯明父

蓋頭即可居容膝即可安連雲大厦千萬間何如壺中
宇宙寬壺中何所有筆牀茶竈葫蘆酒壺中何所為目
送飛鴻揮園絲牕前祝融老僧竹壁上九疑狂客詩壺
中主人知為誰啖棗仙伯雪鶴姿左攬玄微袂笑移砥
柱弄河水右拍長房肩飽餐麟脯傾玉斝蓬萊山在何
處勸君且占壺中住不曾上到金馬門也應不識崖州
路探禹穴浮沅湘脚下塵土鬢上霜我到壺中如故鄉

謝楊孟溪縣丞惠以章墨

白首侯芭蜀江邊曾向君家傳太玄射熊草賦留殘墨
相應當日還渠得飄零蕭洒幾世孫解得膠法春玄雲
物理往來元莫測後世子雲還舊壁君家所有更贈君
君還贈我何慙慙感君慙慙復三歎努力西牕磨鐵硯
太玄艱深吾不為願寫誠齋易傳探玄機

佳人兩章寄許東溪

衡之山鬱蒼蒼我有佳人在山之陽木難為佩兮雲錦
為裳愛而不見兮我心憂傷安得為鷗鵬凌風置君傍

衡之山鬱蒼蒼衡之江清且漪我有佳人在江之湄朝
飡落牆兮夕饌江蘼欲往從之兮我馬虺隤安得為琴
高江波與君隨衡之江清且漪

古體

登濂溪太極樓

岑樓跨層崖灌木翳顏沼曠哉宇宙心况茲展遐眺前
哲日以遠川麓被文藻芳甸馥荃蘅枉渚雜鳧鳥亭亭
沼中蓮冉冉庭下草扣寂參太極換化領衆妙俗薄神

理乖力柔聖途杳英英考亭翁反心會天奧萬理粲良
言一誠貫元造勗哉登樓人畢景盡此道深根復深根
篤行以為寶

送程營道官滿赴闕

高旻振爽籟蒼鴈鳴芳洲傾城餞茂宰鄉耆羅藻舟茂
宰蘊淵道厥源溯伊流字吐振仁策範俗惇聖猷夷心
灼理要政簡吏統周芳風被儒肄惠術淪農疇魯封有
馴翟張廷無訟牛慨茲戒徂西離衷鬱綢繆贈我茂叔

蓮紉君晏子裘慶霄睽鳳躍神囿瞻麟遊世道日以隘
民瘼誰克瘳厲志抗遐業吹萬溥九州揆余忝皇鑒敷
文勉征愁行行重行行夷庚無駐舟

次韻李監丞月夕閔雨

種黍早欲槁疾藜秋向榮哲匠軫民瘵慨此夜魂明奪
收正秋歛肥遺何縱橫仰霄睽蟾曜聆埴鶴鳴彼美
玩華光芳樽酌麴生崇榭歌窈窕秀質羅輜輶節序孰
不歡宅生念匪輕同胞正焦燈對酒何忍傾恤喜限惓

智同茲感陰晴淦淦山雲起策策林颺驚企彼天瓢潤
弭此農棹聲崇情發翰墨賞心謝籌觥溥澤乃夙念穹
爵豈所營榮賤有異分感茲反巖耕

次韻李監丞城西紀游

叫舜問寥濶詠瀟滌塵囂駕言城西游慨彼往哲遥儀
鳳不可呼駕鷺浴清瀟懷或光風杳蕙若吹涼颺蒼梧
隴雲愁廬阜大闕彫豈無人希周亦有文規姚佔畢末
學陋俗薄神理銷沿流浮伊洛汴源窺羲堯執中與太

極萬古瞻魁杓察微篤強力賢聖諫匪遼舜官翳灌木
漁塾棲叢茗觀乎紀游作悟彼進學條蘭卮娛才彥豈
謂磊砢澆得深情賞愜理勝英藻超揆予果何為農野
勤耕穠景迫昧見道曷奉德化昭

次韻李監丞同劉玉淵游七泉

世變而流水前哲嗟逝川良牧隆化本訪古漫叟泉念
茲名泉意感彼末俗偏淵竇與嵌白杖履聊回旋不識
漫叟心曷誦漫叟篇惻念軫蒼氓溥澤同一天蟻聚與

羔晚命義當亦堅回邪乃敗德毋以己欲專夸士五鼎
辱穹爵或自纏臨流歎澆風薄言傾酒船浸泉旌吾志
凍泉存舊傳漣池孝洑銘石昭萬年無闕感發人黜
彼敲墨疆歲月亦云久古迹埋塵煙泉根石已泐泉上
樹欲仙森戟呵虎士誰能聽潺湲理義著古今貴賤俱
荒阡今公七泉游陵谷尚未遷勵俗振古道及茲誦惡
圓劉侯同襟期賡唱揮彩椽漫叟或有知騎鯨躍層淵
彼哉賦君父圓曲工求權厲民恣屠斲巧宦勤攀緣安

得激七泉布作化雨宣

送綱齋李監丞赴湖南提舉

吏統久已紊使選匪易為蝎虺何秦秦鴻鴈何累累持
節豈不多曠職苟所私緬懷紫陽翁昔使東浙湄陳臬
糾官邪揚仁蘇民疲茲道有後先哲儒昭令規綱齋寄
蒲牧邦懋灼帝知勵廉肅察寀反稅驩鄉者所學蘊淵
道寬嚴權理宜茲總全楚境歌此皇華詩位穹民言邈
壤廣吏蠹滋問俗職所重簡僚乃政基視聽貴遠周細

微在可遺攬轡戒前路豈為好爵縻
揆予忝英盼懷德念別離別離彼何
念康濟乃所期懿茲遠大業肇此咨
度時勗哉振英采慰我湘民思

秋夜感懷

溽露沾灌莽華月流高昊嗟嘉此夜
撫化悲蕭辰蕭辰何所悲遊子多苦
辛道峻悟力謝業遙昌志湮玄鬢
日以變豐景將遂淪堪與一大宅
羲娥為旅人卉木互榮落蛩蟀何
吟呻氣隨稚耄變理勝邱喜均反
性樂天

爵測化葆道真撫卷慨往哲芳猷藐難親

江湖小集卷八十四